

Guangjsih Minzczu Bau

ganhhau: CN45-0036 B.2020 Nd.3 Ng.4 liggaeuq gengceij nienz ndwengeih cib 'it

广西民族报

(壮文版)

主管主办: 广西壮族自治区

区民族宗教事务委员会

编辑出版: 广西民族报社

出版期数: 总第 3413 期

Lungzanh Yen Saedhengz Vah Minzczu "Sam Haeuj" Hozdung Bangdoi Hag Caeuq Doigvangq Vahcuengh

Geij bi neix daeuj, Lungzanh Yen gaenxmaenx haiguh hag caeuq doigvangq Vahcuengh, doenggvaq haiguh Vahcuengh haeuj hagdangz, Vahcuengh haeuj gvangjibo densi, Vahcuengh haeuj goenggungh hozdung caeuq goenggungh fugsah gihgou, hawj hag caeuq doigvangq yungh Vahcuengh aeundaej cingzyauq haemq ndei.

Vahcuengh haeuj hagdangz, hag caeuq doigvangq Vahcuengh daj lwgnyez guh hwnj. Youq Lungzanh Yen Minzczu Cunghyoz, Nazdungz Cin Nazmwz Siujyoz daengj 6 aen hagdangz haiguh sawq son' gyaug Cuengh Gun song saw vah, seizneix 6 aen hagdangz gungh miz 3048 bous hagseng ndaej hag Cuengh Gun song saw vah. Lai bi daeuj, Lungzanh Yen miz maeuzveh bae gunghanq lauxsae Vahcuengh, bwh ndei vunzcaiz Vahcuengh, haenqrengh haiguh genjleh hagseng dinghyienq bae hagdangz doeg ciennieb Vahcuengh, seizneix Lungzanh Yen boiqbwh lauxsae Vahcuengh 20 vunz, baujmaenx sonhag Vahcuengh swnhleih guh. Aen hag-

dangz Cuengh Gun song saw vah moix aen singhiz cungj hwnj song dangz Vahcuengh biucinj, moix aen haggeiz cungj ciuq gij saedsaeh gak aen hagdangz haiguh aen ndeu daengz song aen gyaugyenz hozdung, haiguh doxdax hwnjdangz Cuengh Gun song saw vah, yungh Cuengh Gun song vah doxdax gangj gojgaeq daengj.

Vahcuengh haeuj gvangjibo yingjsi, Vahcuengh cienzboq gvangq gyae. Youq Lungzanh Densidaiz haicuengq aen lanzmoeq densi 《Saehmoq Vahcuengh Lungzanh》, aen lanzmoeq neix ndaej daengz vunzlai Lungzanh Yen haenggyaez, cwgoemq vunzlai daengx yienh 85% doxhwnj, yingjyangj gyae. Daengx yienh 11 aen yanghcin 118 aen hingzcwngcunh cungj laeb miz camhgvangjibo, cang miz lajmbanj mizsienq gvangjibo, guhbaenz gij gvangjibo vangjloz mizsienq, mbouj mizsienq, diuzbinz dox giethab, gak aen camhgvangjibo cungj boiqbwh miz bousboqyaem Vahcuengh, doenggvaq youq camhgvangjibo yungh Vahcuengh boq

saehmoq Lungzanh, dienheiq yawhbaug daengj neiyungz, yungh Vahcuengh senhconz gvangjibo yingjyangj gvangq. Gyagiengz hoizguh caeuq boqcuengq denyingj Vahcuengh, bi 2018 doxdaeuj, Lungzanh Yen gungh yungh Vahcuengh hoizguh denyingj 20 bouh, gungh cuengqingj denyingj Vahcuengh 850 lai ciengz, bouxyawj daengz 13.6 fanh vunzbaez.

Vahcuengh haeuj goenggungh hozdung caeuq dieg goenggungh fugsah, mboujdan gyalai gij rengz yingjyangj Vahcuengh, youh fugsah ndei vunzlai. Youq ciet fwen "sam nyied sam", ciet hongdawz "ndwenseiq cobet", ciet liyouz "vwnzva naz" daengj ngoenzciet conzdungj deihfueg, bousbiujyienj yungh Vahcuengh yienjciengq yienjheiq, caenh'itbouh gyalai gij rengz yingjyangj Vahcuengh. Doiq miz vunz dan rox gangj Vahcuengh, mbouj rox Vahbujdungh geijlai, Lungzanh Yen gyalai youq dieg goenggungh fugsah yungh Vahcuengh, ndaej engq ndei fugsah vunzlai. (Suh Meizcough)

SIUSIK DINJ

● Geij bi neix daeuj, Denhngoz Yen aeu hwnghat youzcz canjnieb dangguh gij canjnieb youqgaenj lajmbanj canjnieb gezgou diuzcingj caeuq vut gungh gunggheng daeuj guh, gaenxmaenx damqra canjniebvaq guenjguh vunqsik, doidoengh youzcz canjnieb gveihmoz caeuq yauqik cungj daezswng. Doengzseiz, gyavaiq ganq goyouzcz ndei caeuq hwnjguh dieggoek dinfaex, gaenxmaenx doigvangq dinfwnghz senhcin ganq dinfaex, doicaenh youzcz canjnieb hwnghat ndaej ndei.

(Denz Siyenj)

● Mboengqneix, Sinhcin Lungzvaz Gih Cwngfuj caeuq Gvangjsih Nanzningz Lingjdo Sinhngwzyenz Gohgi Mizhanh Gunghshw gvansim vunzlai Dunghlanz, youq mwh gij doxgaiq fuengzhoh binghraq bwtneuh yienghmoq giepnoix, gien buek doxgaiq fuengzhoh ndeu hawj Dunghlanz Yen. Ngoenzhaenx, Sinhcin Lungzvaz Gih Cwngfuj gien 10000 aen goujcau hawj Dunghlanz Yen, Gvangjsih Nanzningz Lingjdo Sinhngwzyenz Gohgi Mizhanh Gunghshw gien 2500 aen goujcau, 130 doengj ywsiodoeg dij 36000 maenz.

(Loz Youjshw)

● Geij bi neix daeuj, Sihlinz Yen Bujhoz Myauzczu Yangh Dangjvej, Cwngfuj mboujduenx damqra diuzroen canjnieb banggunghz, ciuq dieg bae guh, youq Sihlfungh Cunh, Dahoz Cunh, Bujhoz Cunh ndaem makgamdiengz, youq Vwnjyay Cunh ndaem youzcz, youq Nganzlaz Cunh ndaem vacu daengj.

(Hij Cunghgoh)

● Mboengqneix, Lingzyinz Yen Vwnzlenz daeznaeuz vwnzyigai haiguh cauuhguh cawjdaez vwnzyi, gujli gyoengq vunz guhhong vwnzyi doenggvaq vwnzyoz, ciengqgo, yienjheiq, ingjsiengq daengj yisuz hingzsik, cauuhbien gij saehsaed hawj vunz gamjdoengh fanjyingj yawhfuengz gaemhanh binghraq haenx, senhconz cienzdoh gak cungj cihsiz fuengz raq.

(Veiz Senh)

Yungzanh "Dangcin Hengzdoengh" Bang Dauq Gangjvei

Ndwen 2 ngoenz 28, Liujcough Si Yungzanh Yen banh "dangcin hengzdoengh", vih nungzminzunggh gungzhoj haidoeng aen cienci ciepsongq nungzminzunggh haeuj singz dauq gangjvei guhhong mbouj aeu cien, aeu 239 bous goengrengh gungzhoj aenvih ngaiz binghraq bwtneuh yienghmoq yingjyangj mbouj ndaej gibseiz dauq guhhong haenx, doiqciep soengq daengz Gvangjdungh Swngj Gvangjcough Si, Veicough Si, Dunghgvanj Si daengj dieg giyez, cigsoh aeu gij goengrengh lai lajmbanj gungzhoj soengq haeuj gunghcangj guhhong, bang nungzminzunggh ancienz miz bouhloh dauq gangjvei. Ndaw doz dwg nungzminzunggh baizdoh hwnj ci.

(Danz Gaijhingh/谭凯兴)



Liujcwngz Yen Haiguh Aen Hozdung Gagnyienh Fugsah Minzczu Doxgiet Bangrenghz Hong Hoenx Binghraq

Aenvih yawhfuengz gaemhanh binghraq aeuyungh, haujlai aen bouqdaeqgyaeuj cungj mbouj ndaej hai, daeq gyaeuj gij saeh bingzciengz neix seizneix baenz gij nanzdaez caezgya, vunz guhhong giensouj youq itsienq hoenx binghraq engqgya mbouj ndaejhoengq bae daeq gyaeuj. Vihneix, Liujcwngz Yen haiguh aen hozdung gagnyienh fugsah saedhengz vwnzmingz seizdaih moq minzczu doxgiet, heuhcomz bouxgagnyienh ganbu minzczu vunznoix, bae doengh aen bouhmonz itsienq hoenx binghraq caeuq dieg minzczu daeq gyaeuj hawj vunz guhhong youq itsienq hoenx binghraq

haenx mbouj aeu cien.

Donzyenvej heuhcomz bouxgagnyienh bouxcoz haiguh aen hozdung goeng'ik daeq gyaeuj mbouj aeu cien "hauxseng hoenx 'raq'". Gonqlaeng bae yen sicangz genhgvanjiz, yen gungh' anghiz, yen yinzminz yihyen, yen cunghyih yihyen daengj danhvei, bae daeq gaeuj hawj vunz guhhong youq itsienq hoenx binghraq haenx. Youq Gujcai Mulaujczu Yangh, yanghchangj caeuq geij bous cunghan Mulaujczu gapbaenz aendoih gagnyienh fugsah, bae daeq gyaeuj hawj vunz guhhong youq itsienq fuengz binghraq haenx. Fag geuz ndeu, fag roi ndeu,

aen ej ndeu, mbaw bangindang ndeu, bwn'gyaeuj nyungqnyat hawj gyoengqde daeq gvaq le, baenz ndaej caezcingj dangqmaz.

Daengz seizneix, aendoih gagnyienh fugsah gyoepsuenq daeq gyaeuj hawj gyoengq canghyw, gingjcaz, ganbu cizgungh, vunzmbanj 500 lai vunzbaez, yungh gij hengzdoengh saedsaeh vih gyoengq vunz guhhong youq itsienq hoenx binghraq haenx gajgeiz hojnanz, vih dwkhingz ciengzciengq laengzhoenx yawhfuengz gaemhanh binghraq okrengh.

(Veiz Gyausjiengh/韦巧霜)